

**Enaan eo an President Hilda C. Heine
nan Nitijela eo an Armij in Majol
ilo Kwelok eo an kein Kaenoul Jiljino
Mwenan eo Kein Karuo
[MARSHALLESE VERSION]
August 4, 2025**

Iokwe komwoj aolep, komro iloan Jikin Pepe in e-utiej an Armij in Majol, kab komwoj aolep iloan im ilikin Ailin Kein Ad.

Imaan men otemjij, jej bojrak ilo lelok kile, kamolol, im kautiej nan Eo ej ad Ri-komanman kin jouij im onaake eo An nan kij, im kin An kojbarok armij rein ad im lal jidikdik in ad ilo ad jimor bukot juon iliju eo emmanlok nan ebebin ko tok-elik.

Ijo ke mokta jen ao tilmake naan jidik in ao ilo jibonin rainin, ij bok ien in emman im lelok ao kile im kautiej Manit in ad, Chairman im Vice Chairman eo, im Irooj, Lerooj, im Owner eo ilo Imweo imon Irooj, ekoba Lejla ro im Irooj Eman ro. Juon kile eo ejenoklok nan Lerooj Esther Zedkaia im Irooj im Lerooj ro mottan ilo Majuro in.

Kile eok Mr. Speaker, Mr. Vice-Speaker, Cabinet Minister ro, Senator ro kajojo, im ro karejarimi;

Ij bok ien in emman im lelok ao kile Chaplain in an Nitijela, ekoba aolep Ri-kaki im Kora-in-Rikaki ro jined ilo kabun ko ad kajojo;

Kile Chief Justice eo im aolep judge ro ad ilo Imon Ekajet ko ad ilo belaak ko aolep ilo Ailin Kein;

Ij bareinwot bok ien in emman im lelok ao kile Mayor eo ad ilo Majuro in, Opija ro an MIMA, im mayor ro ad kajojo ilo jukjuk-im-bed ko ad ibelakin ailin kein;

Kile Chief Secretary eo, Acting Chairman eo im ro ilo Public Service Commission eo, im aolep ro roj jeban ra ko im SOE ko, ekoba aolep rijerbal ro aolep an Kien in ad;

Kile aolep ambassador rein jen lal kein mottad (Taiwan, U.S., Australia, im Japan) ro im elap ijo konair ilo kwonmaanlok kottobar kein an Kien in ad, ekoba rein jet mottad jen United States Garrison Kwajalein Atoll;

Kile im kamolol ro ilo private sector eo, im doulul ko ilikin Kien, kin ijoko rellap konami ilo edoklok eo an lal in ad.

Elap ao monono im utiej bwe imaron in boktok enaan jidik in ao nan Nitijela in im armij in ailin kein ilo kwelok in kien Kaenoul Jiljino, ilo mwenan in kein karuo.

Juon in tore ejjab pidodo nan aelon kein ad. Pepe im komman ko an lal ko rellap rej jelete kij ilo an ejjelok ainiked ilo pepe kein aer. Mekarta, ejjab aikuoj bojrak ad bok konaad ilo doluul ko an lal in ilo aer emmej rake jimwe im maron ko an lal ko kajojo im armij ro ie, ekoba lal kein re dik im emejno kila er ilo okotak kein rej walok.

Jen ien nan ien jej kajitikin tokjen an ri jermal ro ad etal nan kwelok ko an doluul ko ipelakin lal in. Jej pere aurok in jermal ko aer.

Ilo week ko lok, armij in lal in im aolep armij in woden bwil kein ilo Pacific in, ekoba armij in Majol, jouj ar bed ilo juon mejatato in kamool im monono ippan dron kon juon jemlok eo elap an emmon im ear itok jen International Court of Justice (ICJ), iumin tel eo an Vanuatu. ICJ ej jikin ekajet eo me e utiej tata ilo lal in. Jemlok in an ICJ elap an mwilal, im ej kalikar ke jimwe eo ebed ippad, im ro jet, ilo ar tarinaeik oktak in mejatoto; jemlok in ej kalikkar bwe jimwe im maron in ad nan pad ilo aeneman jen kapanpan kein rej itok jen oktak in mejatoto ej juon eo lal ko jet rej muri naj kij kaki.

Jemlok in ej bar eiwot kalikar im kapinlok jimwe im maron eo ad einwot juon lal, ilo ar jelmae sea level rise, uteej lok in lojet, ilo an kile bwe eban jenak jonan pelaak eo an lal in ad im emoj ad katot e ilo UN im ijoko jet rekkar mene jet ian ene kein ened re maron lipopo kin den ilo tore ko tokelik. Jemlok in ej bareinwot kalikar im kabinlok kotobar eo an Kien in non an bok kunaan im jutak pin iben lal ko jet ipeklakin lal in non drebij wot 1.5 degree eo me jaar kate kij kake mantak im ej lolo iumin Paris Agreement eo, juon kon eo ewor kilan einwot juon kien im ej jelet aolep.

Ikonan kile ri jikuul in Pacific in ro ilo Emalus Campus eo an USP, kon lo emman eo air ilo aer kar bok kunaer im ejaake juon kolmenlokijen eo ear jarjar ICJ case in jen e, i bwiljier ekoba juon ad ri jikuul jen Majol in, Atina Shulz. Ej kain kapeel, kijejeto kab beran ko kein im rej letok non na tomak im kojedrikdrik ke dri-Majol remaron ion, jelmae, kijone im ella ion jabdrewot weween kab kanban ko jebar jen oktak in mejatoto im ko jet eierlokwot.

Ij bareinwot lelok ao nebar im kamolol nan Ministers ro an Foreign Affairs im Environment kin tol ko aer, Ambassadors im rijerbal ro ad ilo Mission ko ilo New York im Geneva, ekoba Climate Envoy ro, kab lawyer im rikokabiloklok ro raar jiban Kien ejaake testimony ko an, elaptata team eo ear tilmake testimony eo an Majol imaan ICJ, HE Amb. John Silk, Deputy Attorney General Jonathen Kwawakami im Envoy Kathy Jetnil-Kijiner.

Kein karuo ikijeen jermal kein an Kien i pelaakin lal in, ilo May eo, ilo kwelok eo an World Health Assembly (WHA79) ilo Geneva, Majol ekoba jet lal jen Pacific in Latin America rar le maanlok juon resolution eo ear weppan ipan majority in lal ko 194 ilo kwelok in. Resolution in ej kajitok im rejan bwe WHO en kalikar ke elap jorraan ej walok nan eejmour an armij jen tarinae im kein tarienae ko rej kojerbal nuclear im en komane juon report eo ekaal im ej kalikkar weween an jorran kein jelet eejmour im kalikkar ijo konaan WHO nan jipan kejparok ejmour an ro weween in ej jelet ir.

I konaan lelok an armij in Majol kamolol nan Minister eo an Jikin Eejmour im Team eo an jen MOHHS im ro ilo Embassy ko ad ilo Geneva im bareinwot UN koba Envoy

eo ad ikijien nuclear im human rights kin aer emejraaki weween kein nan kejparok ejmour im jimwe im maron eo an armij in Majol.

Torbrak in jermal kein ruo rej kalikkar ke ejab jemlok ad pukot jipan ko jen ro jet nan na mejlan aban ko rejelet mour an armij in Majol jen nuclear legacy eo je melele kake im bareinwot oktak in mejatoto ak climate change.

Itok wot nan wod in bwil kein, Mr. Speaker, elap ao tomak ilo an Majol bok konaan ilo doluul ko an Pacific region in. Allon eo ej jemlok, Majol ear host nan elon kwelok ko an region in (Vaka Pacific Education conference im Micronesian Shipping Commission) im subregion in (Micronesian Islands Forum) ko rej kepaaktok kij nan doon einwot jet ri Pacific, bwe jen ekkatak jen doon, im jipan doon ilo aban ko ad im kijwoj ej aolep ioni. Regionalism, jermal ipan doon einwot an lal ko ilo Pacific kuk ipan doon kin kotopar ko remman nan aolep ej komman im kotak juon ainiken eo e kajoer I pelakin lal in, eo im juon lal make ian eban maron komane.

Mr Speaker, ilo news pepa eo an week eo lok, jaar lo juon bwebwenato jen juon iaan rijerbal ro ilo High Commission eo an Tuvalu ilo Wellington, New Zealand, ikijien an jab bo buruon kien en an Tuvalu ilo an wanlontak melele ko ikijien an Taiwan maron, ak jab, kobalok ilo kwelok ko an Forum im renaaj bok jikier ilo ailin in Solomon kan. President eo an Palau ear bar konono ilo news nae weween in im Kij ilo Majol jej bar kwalok ad jab erra ilo jekjek in.

Ilo tu kadu in, ri-jeje in ej notaik an wor abilonlon ikijien waween in einwot ke Taiwan eaar baj mottan wot Forum jen juon thousand ruatimjuon buki ruatimjuonoul jilu eo (1993).

Mr. Speaker, ij erra ilo melele in ke Forum in ej an lal kein ilo woden bwil kein, im jijab aikuuj kotlok an lal ko jet ilikin kwelok in kwalok tok nan kij ewi waween ad kajebwebweik jikin kwelok in e-utiej. Ilo an kajojo lal jab juur maron an bar juon, maron eo nan an kajojo ri tel, ak lal, kur tok ro mottan nan kwelok kein ej aikuuj alikkar.

Jaar lo ilo kwelok eo iio eo lok an Forum ilo Tonga kan, an China, juon lal eo elap im kajoor, iuun bwe en lon oktak iloan jemlok eo, ak communiqué eo, an kwelok in an Ritel ro. Juon in imenene ejjab emman, im kien in ami eban erra ie. Ilo ao lale lok, ne eindein ad kotlok an lal ko ilikin Forum in an Pacific, kwalok tok nan kij ewi waween ad kommani kwelok kein ad, innem ejelok unin ad bed ilo doulul in.

Mr. Speaker, einwot am jela, ewor juon jermal in etale ej bok jikin kio nan komman oktak ko rekka nan weween an Pacific Island Forum im doulul ko mottan, SPC, SPREP, FFA, im ko jet, jermal nan kij, im nan komman bwe en jejjet im kon weween aer kattori eddo kein aer jen doon. E aurok bwe etale in en kalikka, ilo ejjelok kajitok, wewen an PIF kalimjek jekjek rot in ej walok nan Taiwan im partners ro an im kallika juon reimaanlok eo enaj karok juon aeneman ilo kilen adwoj jermal ipan doon. Jej kamolol bwe Majol ej represented ilo High Level Panel eo ej komane etale in ilo an Minister eo en Jelalokijen jijet ilo etan Micronesia region in.

Mr Speaker, ijelokin ad juumemej aelon kein ad kin oktak kein rej bok jikier ipelakin lal in, im bareinwot ko ilo wod in bwil in Pacific in im rejjelt armij in Majol im mour ko ad, Kien ej ped wot ilo an lolorjake jermal im kotobar ko adwoj iumin Agenda 2030. Ilo week eo ej jemlok lok, Cabinet in ear komane juon an Retreat nan an etale jermal kein kajojo im lale ia ko ej wor wot likjab ie nan pukot mejlair.

Tibdik in report in jermal kein renaj duoj tok jen kajojo ministers iloan raan in kwelok kein maanwaj, im juon report in jermal kein enaj itok nan ibam ilo ran kein maanwaj, ak I monono in report ke, 18 allon jen ke Kien in ear ejaak, elaplok jen 50% in kotopar kein rededlok ak rej pojak in dedelok.

Jej kamolol bwe etobrak jet ian kotobar ko konono kaki ilo iio eo kio einwot Dialysis Center eo ededlok; Monetary Authority eo emoj an jutak; ij kamolol Minister eo an Finance im Foreign Affairs im envoy eo an Compact Implementation im rijermal ro aer koba ritel ro an kajojo aelon ko an END bwe ej bojak in dredrelok jermal in; emoj an etal proposal ko nan aer etali im jej reimaanlok nan aer nej bojak; bareinewot ENRA epojak in komane kolla eo imaan tata ilo quarter eo ilo yio in; new airport terminal eo ej pojak in jino ekkal rumij wot bond issue jej kajeon lipjerjere, bids ko nan new capital building rej kio etali nan lelok award nan eo enaj kelok e; juon passport im immigration office kaal enaj pellok week in, koba elon lok re jermal ro renaj komakaj lok jermal kein; social support scheme eo nan jipan rutto ro rejjab bok jipan jen social security program eo ekoba ro ewor mojno ilo enbwin ej ijjino ilo Oct. 1 ran.

Mr. Speaker, ejjelok kajitok ke jej aikuj kamolol Iroj im en jab bwijrak ad kejatdikik.

Kio Kien ej reimaanwaj nan jet elmokot ko re-kaal nan jipan armej rein ad. Jet iaer re pad Iloan budget ne ekaal im enaj itok nan an Nitijela in waate iloan week kein maanwaj, new initiatives rej laajrak:

1. Einwot ad kar kalimur iio eo lok, minimum wage an aolep ro ediktata woner enaj laplok kin \$.50 cent nan \$4.50 juon awa jino ilo Oct. 1.
2. Healthy snacks in jibbon nan ri jikuul ej pojak in komman. Proposal eo nan komane weween in bwe en bok jikin iumin supplemental fund ko nan ejmour rej kio jerbale. Elmokot in ej jino kin lelok leen wojke etc. den ko reune einwot milk, juice, ni) nan eddeik lok im jipan elaptata mona in jibbon ko an ri jikuul. Ij tomak ke mekarta ne jijjab maron lelok mabun eo elikio ilo tore in, snack kein re-une, enaaj lap an jiban rijikuul rein nejid.
3. Ededlok juon kon ipan Bank eo an Guam nan lelok nan MIDB tarrin \$10M nan an jino jipan business ko an ri Majol im rej aikuj jeen nan kokajoor im kolaplok business ko aer (hotel, construction co. im ko jet). Term ko erra kaki nan ro renaj kojerbal jeen in ej jet ko remman im elap aer naj jipan business kein.
4. Kakien ko nan kokaal im kajutak juon Taxation Regime eo enaj pidodo lok ad komadmode im enaj jipan kolaplokl ewoj ko renaj jipan Kien im Aelon Kein rej pojak in itok nan Nitijela elkin an lap jermal in etale ko emoji aer bok jikier ipan private sector eo. Ikonaan bok ien in im kamolol aolep kapilok ko raar itok nan team eo an Minister eo an Finance nan jermal in bwe en emmonlok im bolel nan aolep.

5. Juon loan jen World Bank nan kalok ruo hospital kaal, ilo Majuro im Ebeye, ej kio pad ilo torear konono nan kadedelok ien eo emokaj. Jej reimaanlok nan ad maron sign juon kon ilo margin in kwelok ko an PIF ilo Solomon Is. Kotopar eo in bwe WB en letok jeen kein rellap im jej aikuji im Kien en kolla jidik aolep iio jen jidik in kejemooj eo nan jeen in ekkal ko an Kien jen Compact ilo aolep iio.
6. Ij melele ke lease eo nan kajutak headquarter eo an imon Policeman koba imon Kalbuuj ak Jail eo ededelok im ejjab etto ekkal an mwin eo eto im to ad kotare, enaj bok jikin. Ij kammolol Minister eo an Justice im rijerbal ro mottan raar iuni project in im lolorjake lease in bwe en maron tobrak.
7. Ewor plan im kejatdikdik bwe Embassy eo an Majol ilo UAE en pellok mokta jen December. Minister eo an Foreign Affairs ej kadedelok jermal in.
8. Epojak in dedelok juon karok ipan PII bwe en bij i jikin jok im kelok ko an balun ilo outer islands, jej reimaanlok ne emaron tobrak 3-4 jikin jok im kelok ilo juon iio. Kammolol jermal ko an Ministry eo an WIU im AMI ro renaj karok airport ko ta ko rej bij moktata ekkar nan jonan aer kwalok jeen nan AMI.
9. Eliktata, juon elmokot jej konono kake ipan Fiji Airways nan koman flight ikotaan Fiji/Majuro im etal nan Honolulu. Kon in enaj juon eo elap an aurok nan kapdodoik lok weween emakiutkut ion mejatoto. Kile im kamolol Ministers ro an Transport im Finance ilo aer lipjerjere jermal in ipan Aviation Task Force eo.

Mr. Speaker, projects keinkoblalaiki reban tobrak elane ejjab jen joij eo an rein aer bwidej kein im jej kajutak jermal kein ioer. Kien ej kwalok an kamolol aolepeir kin karejar im jipan kein nan Kien im armij in Majol. Iumin tel eo an Minister eo an MOCIA im team eo an, jej kejatdikdik bwe aolep lease ko rejanin dedelok renaj kon im tobrak.

Mr. Speaker, mene jej loe im kamolol bwe elaplok an ri jermal ro rej komman jermal in liakelok ro ilo obij eo an AG im ko jet jej lo ke initetlok aer komani case kein, ro rej kajjejtokjen kakien ko ad im kokkuri men ko mewin Kien im armij in Majol rej laplok wot aer komman jorran.

Jenaj konono kin aban kein, einwot corruption im ko jet ilo raan kein imaan waj, ak rainin iar konaan kaluruj ad kolmenlookijen kin joraan ko rejelet jodikdik ro nejid ilo an lukkun laplok, katak ko rej kwalok bwe 5 alen an laplokjen jen 2020 ao, an jodikdik kojermal den in kadok im uno ko re kajoer im kobaatat bareinwot. ipan ledik im ladik jimor; ejja ilo tore in wot, bororo ipan ledik ro nejid, teen pregnancy, ej laptata an walok ilo Majol keidi nan lal ko jet i pelaakin in Pacific in. Eejmour eo an jodikdik rein ejjap eman ilo an lon e tar jen jonan aer eddo, im bareinwot lon rej depressed ak buromij im lemnak in mane ir make.

Kien ej kajitok an kajojo Jinen/Jemen emejrake im melele kin ta kein rej walok nan ro nejid. Kajitok bareinwot an Kabun ko step in ijoko re maron i im katakin jodikdik im ajiri ro kin wewen mour ilo jela eddo ko rekkar im jab mour nan ir make.

Kien in iumin tel eo an MOCIA im Envoy eo an kora, youth im ajiri, koba Ministry eo an Education renaj koba ilo komane ijo konaer ak ej ebok aolep ro ilo jukjukin pad kein nan ad jolok ien ipan ro nejid im melele kin aban ko rej eddodo kaki im rej iuun ir nan kojerbal drug, alchohol ak kobaatat, ak ijjino kajiriri, ilo tore kein ejanin ekeke kolmenlokijen ko aer im enbwinnier bareinwot.

Mr Speaker, ijelokkin problem kein jej loi ipan jodikdik rein nejid, jej kamolol bwe elon ro jet iaer rej bok konaer im lelone tak etan family ko aer im lal in aer. Ilo allon eo lok, ewor 55 ian rein nejid raar bok kunaer ilo Pacific Mini Games, ak ikkure ko rar komman ilo Palau. Ibwiljin rein raar bok konaer, ewor 9 iaer raar tobar mejjan kajjik im boktok win ak 12 medals ilo etan Majol in. Elap an uteej bureed kin ajiri rein, im jej konaan kile ir im kwalok ad kamolol ir aolep elaptata rein raar boktok medal kein ilo etad: 1. Kiaben Kennedy, 2. Idor Zytea Harris Jr., 3. Neal Hicking, 4. Zyra Nemana Harris, 5. Olivia Reed, 6. Jordan Lemae, 7. Sydel Ma'alei Ajen, 8. Merean Atantaake, im 9. William Reed. Juon ian athlete rein, Zyra Neimana Harris 16 an iio, ear etal nan e Best Outstanding Female Junior Athlete Award. Lelok juon kapokpok nan ajiri rein. Ij bareinwot kile im kammolol President eo an MINOC, Minister Muller im ro mottan, Chef de Mission eo an Game kein, Bobby Zed im aolep coach im ro raar emejraake im jerbal iben team kein bwe en maron itok award ko nan Majol.

Nan kokajoorlok itok limo im kollaplok an jodikdik ro bok konaer ilo ikkure ak games kein, Kein ej pojak en lemaantak juon Kakien eo enaj na mejlan monetary awards ko naj lilok nan kwalok ad kamolol im kile kijejeto eo juon athlete ej komanle ilo an kate bwe en maron bok medals ilo ikkure ak games kein ilo Majol, ilo region in im I pelakin lal in bareinwot!

Mr. Speaker, nan kojemlok naaj jidik in ao ilo jibonin rainin, ij bok ien in emman nan rejan kijwoj ro renaaj bok leen menin jeramman kein rej pojak in koba tok ilo budget ko an kajojo family jen ENRA im ko jet, bwe en laplok an tiljek an baamle ko ad kojerbal jaan kein nan komman bwe jokkun mour iloan moko en emman lok. Jij remaanwaj ilo kojatdikdik ke ro roj jeban baamle kein ad renaaj kojerbal money kein nan lonaj mour im ejmour nan bamle ko kajojo ilo an laplok wonaan mour ilo Majol in rainin. Am im am bebe, ejjelok kajitok, ak jej rejan doon ilo kilaan iokwe im jipan doon.

Kin naan kein, Anij en kojeramman kijwoj jimor im lal jidikdik in ad.

Kommol tata, Mr. Speaker.